

金剛般若經疏論纂要下

漢三

京大興福寺沙門 宗密述 長水沙門 子璿治定

八斷持說未脫苦果疑論云向說捨身苦
身果報故福劣若爾依此法門持說諸苦
薩行苦行亦是苦果云何此法不成苦果

漢三

○斷之文二初明超忍以斷疑二○初明

忍體

須菩提忍辱波羅蜜如來說非忍辱波羅蜜

忍到彼岸已離苦相况彼岸非岸誰苦誰

忍△

二明忍相二初引一生證極苦忍二

初正明

何以故須菩提如我昔為歌利王割截身體
我於尔時無我相無人相無衆生相無壽者
相

歌利此云極惡佛昔作仙山中修道王獵
疲寢妃共禮仙王問得四果皆答不得王
怒割截天怒兩石王懼而懺悔仙證本無
瞋王乃免害論云不但無苦而乃有樂以
慈悲故○二反顯

何以故我於往昔節節支解時若有我相人
相衆生相壽者相應生嗔恨

二引多生證相續忍

須菩提又念過去於五百世作忍辱仙人於
尔所世無我相無人相無衆生相無壽者相

累苦故忍熟而樂但與正定慈悲相應故
偈云離我及恚相實無有苦惱共樂有慈
悲如是苦行果○二勸離相以安忍論云
若有菩薩不離我相見苦行苦欲捨菩提
心故勸離相無著云為對治不忍因緣有

三種苦謂流轉苦衆生相違苦乏受用苦

○文二○初惣標

是故須菩提菩薩應離一切相發阿耨多羅

三藐三菩提心

若離相發心雖逢大苦即能不捨無著云

離一切相者為離如是三苦相也○二別

顯二○初對治不忍流轉苦

不應住色生心不應住聲香味觸法生心應

生無所住心若心有住則為非住是故佛說

菩薩心不應住色布施

初正明流是集諦轉是苦諦無著云若著

色等則於流轉苦中疲乏故菩提心不生

後引證引前說無住施具舍六度證此文

矣○二對治不忍相違苦

須菩提菩薩為利益一切衆生應如是布施

如來說一切諸相即是非相又說一切衆生則非衆生

無著云既為衆生行施云何於彼生瞋由不能無衆生想故衆生相違時即生疲乏故顯示人無我法無我論云諸相者衆生

相也非相者無我也陰中見我是衆生相

一切衆生者五陰法也非衆生者陰空故

法無我也乏受用苦配在後斷九斷能證

無體非因疑論云於證果中無道云何彼

於果為能作因○斷之文二○初斷疑

漢三

三

須菩提如來是真語者實語者如語者不誑語者不異語者

佛所有說皆如其事今說證果何疑不然

真語者說佛身大菩提法也是真智故實

語者說小乘四諦諦是實義如語者說大

乘法有真如小乘無也不異語者說三世
授記等事更無參差佛將此四語不誑衆
生是故秦譯加不誑語○二離執

須菩提如來所得法此法無實無虛

無實者如言說性非有故無虛者不如言

說自性故有○十斷如遍有得無得疑論

云若聖人以無為真如法得名彼真如一

切時處恒有何故有得者有不得○斷之

文二○初舉喻斷疑

須菩提若菩薩心住於法而行布施如人入

闇則無所見若菩薩心不住法而行布施如

人有目日光明照見種種色

論云無智住法心不清淨故不得有智不

住法心清淨故得有目者如得對治法日

光者如所治闇盡能治現前空喻真如色

喻性上萬德○二讚經功德二○初揔標

須菩提當來之世若有善男子善女人能於

此經受持讀誦則為如來以佛智慧悉知是

人悉見是人皆得成就無量無邊功德

無著云讀誦者此說受持因故為欲受故

讀為欲持故誦論云受持修行依揔持法

故讀誦修行依聞慧廣故是則從他聞法

內自思惟得修行智也故偈云修從他及

內○二別顯十初捨命不如二○初捨命

福

漢三

四

須菩提若有善男子善女人初日分以恒河

沙等身布施中日分復以恒河沙等身布施

後日分亦以恒河沙等身布施如是無量百

千萬億劫以身布施

偈云以事及時大福中勝福德○二信經

福

若復有人聞此經典信心不逆其福勝彼何况書寫受持讀誦為人解說

信經劣於持說多命勝於前喻○二餘乘不測

須菩提以要言之是經有不可思議不可稱量無邊功德

偈云非餘者境界無著云不可思議者唯自覺故不可稱量者無有等及勝故○三依大心說

如來為發大乘者說為發最上乘者說

最上者一佛乘也○四具德能傳

若有人能受持讀誦廣為人說如來悉知是人悉見是人皆得成就不可量不可稱無有邊不可思議功德如是人等則為荷擔如來

阿耨多羅三藐三菩提

成就等者偈云滿足無上界荷擔者無著云有負菩提重擔故○五樂小不堪

何以故須菩提若樂小法者著我見人見眾生見壽者見則於此經不能聽受讀誦為人解說

六所在如塔

須菩提在在處處若有此經一切世間天人阿修羅所應供養當知此處則為是塔皆應恭敬作禮圍繞以諸華香而散其處

七轉罪為佛

復次須菩提善男子善女人受持讀誦此經若為人輕賤是人先世罪業應墮惡道以今世人輕賤故先世罪業則為消滅當得阿耨多羅三藐三菩提

輕賤者惣包於中或打或罵故隋譯云輕賤甚輕賤無著云此毀辱事有無量門故復云甚輕賤當得菩提者罪滅故○八超事多尊論云示現速證菩提法故○文二○初供佛多中全具福

須菩提我念過去無量阿僧祇劫於然燈佛前得值八百四十萬億那由他諸佛悉皆供養承事無空過者

那由他者十億為洛又十洛又為俱胝十俱胝為那由他○二持經多中少分福

若復有人於後末世能受持讀誦此經所得功德於我所供養諸佛功德百分不及一千萬億分乃至算數譬喻所不能及

九具聞則疑

須菩提若善男子善女人於後末世有受持

讀誦此經所得功德我若具說者或有人聞心則狂亂狐疑不信

十惣結幽邃

須菩提當知是經義不可思議果報亦不可思議

無著云此顯示彼福體及果體不可測量

故○十一斷住修降伏是我疑佛教我住修降伏兼不住前十種疑執過患若無我者誰人受教誰人住修誰人如此離過

云亦云除微細執故偈云於內心修行存

我為菩薩此即障於心違於不住道○斷之文二○初問

尔時須菩提白佛言世尊善男子善女人發阿耨多羅三藐三菩提心云何應住云何降伏其心

二答三〇初若名菩薩必無我

佛告須菩提若善男子善女人發阿耨多羅三藐三菩提心者當生如是心我應滅度一切衆生滅度一切衆生已而無有一衆生實滅度者

漢三

七

二若有我相非菩薩

何以故若菩薩有我相人相衆生相壽者相則非菩薩

三能所俱即是菩提

所以者何須菩提實無有法發阿耨多羅三

藐三菩提心者

十二斷佛因是有菩薩疑論云若無菩薩

云何釋迦如來於然燈佛所行菩薩行〇

斷之文四〇初舉疑處

須菩提於意云何如來於然燈佛所有法得

阿耨多羅三藐三菩提不

降怨王請然燈佛入城城中長幼盡迎路泥善慧布髮佛與授記故舉此問〇二斷疑念

不也世尊如我解佛所說義佛於然燈佛所

無有法得阿耨多羅三藐三菩提

善慧彼時都無所得離諸分別由無法故得記若有法者是有相心不順菩提佛不與記〇三印決定

佛言如是如是須菩提實無有法如來得阿

耨多羅三藐三菩提

論云我於彼時所修諸行無有一法得阿

耨多羅三藐三菩提功德施論引佛說云

若見於佛即見自身見身清淨見佛清淨

見一切智智皆悉清淨是中見清淨智亦

復清淨是名見佛我如是見然燈如來得
 無生忍一切智智明了現前即得受記是
 受記聲不至於耳亦非餘智之所能知我
 於此時亦非憍憍無覺然無所得○四反
 覆釋

漢三

須菩提若有法如來得阿耨多羅三藐三菩
 提者然燈佛則不與我授記汝於來世當得
 作佛號釋迦牟尼以實無有法得阿耨多羅
 三藐三菩提是故然燈佛與我授記作是言
 汝於來世當得作佛號釋迦牟尼

無著云若正覺法可說如彼然燈所說者
 我於彼時便得正覺然燈則不記言來世
 當得以法不可說故我於彼時不得正覺
 是故記言來世當得○十三斷無因則無
 佛法疑於中三初斷一向無佛疑論云若

無菩提即無諸佛如來有如是謗謂一向
 無佛為斷此疑故云如來者即是真如○
 斷之文二○初顯真如是佛故非無
 何以故如來者即諸法如義
 無著云如清淨故名為如來猶如真金

二明佛即菩提故無得

若有人言如來得阿耨多羅三藐三菩提須
 菩提實無有法佛得阿耨多羅三藐三菩提
 先標錯解魏云若有人言如來得阿耨菩
 提者是人_{漢三}不實語後釋正見偈云菩提彼

九

行等謂等前菩薩行無得也無著云或謂
 然燈如來所於法不得正覺世尊後時自
 得正覺為離此取故云若人言等○二斷
 一向無法疑論云有人謗言若無因行則
 如來不得阿耨菩提為斷此疑故云如來

所得等○斷之文二○初遣執遮疑
須菩提如來所得阿耨多羅三藐三菩提於
是中無實無虛

論云無色等相故彼即菩提相故無著云
顯真如無二故謂言說故謂彼正覺不無

世間言說故○二釋義斷疑

是故如來說一切法皆是佛法須菩提所言
一切法者即非一切法是故名一切法

論云一切法者皆真如體故皆佛法即非
者由色等法即真如故即非色等法真如

常無色等諸相故是名者即是真如法自
性矣○三顯真佛真法體

須菩提辭如人身長大須菩提言世尊如來
說人身長大則為非大身是名大身

偈云依彼法身佛故說大身喻身離一切

障及徧一切境功德及大體故即說大身

非身即是身是故說大身論云非身者無

有諸相故大身者有真如體故無著云攝

一切衆生大身故於彼身中安立非自非

他故○十四斷無人度生嚴土疑論云若

無菩薩者諸佛亦不成菩提衆生亦不入

涅槃亦無清淨佛土何故諸菩薩發心欲

令衆生入涅槃起心修行清淨佛土○斷

之文三初遮度生念三○初明失念

須菩提菩薩亦如是若作是言我當滅度無

量衆生則不名菩薩

偈云不達真法界起度衆生意及清淨國

土生心即是倒○二明無人

何以故須菩提實無有法名為菩薩

無法名菩薩豈有我度衆生○三引前說

是故佛說一切法無我無人無衆生無壽者

二遮嚴土念二〇初明失念

須菩提若菩薩作是言我當莊嚴佛土是不名菩薩

二釋所以

何以故如來說莊嚴佛土者即非莊嚴是名莊嚴

三釋成菩薩

須菩提若菩薩通達無我法者如來說名真是菩薩

論云若起度衆生嚴土之心即是顛倒非菩薩者起何等心名為菩薩故經言通達等無著云謂人無我法無我十五斷諸佛不見諸法疑論云前說菩薩不見彼是衆生不見我為菩薩不見清淨佛土若如是

則諸佛不見諸法〇斷之文二初約能見五眼明見淨偈云雖不見諸法非無了境眼諸佛五種實以見彼顛倒〇文五〇初肉眼

須菩提於意云何如來有肉眼不如是世尊

如來有肉眼

肉團中有清淨色見障內色名為肉眼佛

具諸根故有肉眼〇二天眼

須菩提於意云何如來有天眼不如是世尊如來有天眼

於肉眼邊引淨天眼見障外色依大般若佛肉眼能見人中無數世界不唯障內若佛天眼能見諸天所有細色除見天外見人等事名肉眼矣淨名云唯佛世尊得真天眼照見恒沙佛土不以二相〇三慧眼

須菩提於意云何如來有慧眼不如是世尊
如來有慧眼

以根本智照真理故○四法眼

須菩提於意云何如來有法眼不如是世尊
如來有法眼

後得智說法度人○五佛眼

須菩提於意云何如來有佛眼不如是世尊
如來有佛眼

前四在佛總名佛眼又見佛性圓極名為
佛眼○無著云為令知見淨勝故顯示有

五種眼略說有四種謂色攝第一諦攝世
諦攝一切種一切應知攝○古德偈云天
眼通非礙肉眼礙非通法眼唯觀俗慧眼
直緣空佛眼如千日照異體還同○二約
所知諸心明智淨五○初約一箇恒河以

數沙

須菩提於意云何如恒河中所有沙佛說是
沙不如是世尊如來說是沙

二約一河中沙以數河

須菩提於意云何如一恒河中所有沙有如

是沙等恒河

三約沙河中沙以數界

是諸恒河所有沙數佛世界如是寧為多不
甚多世尊

四約余所界中所有生

漢三

五

佛告須菩提余所國土中所有眾生

五約一一眾生所有心三○初摠明染淨
以標悉知

若干種心如來悉知

無著云若干種心者有二種謂染及淨即

共欲心離欲心等二會妄歸真以釋悉知何以故如來說諸心皆為非心是名為心

大雲云由一切妄心依真如體都無其性佛證真如故悉知之諸心者標指非心者妄識本空是名心者真心不滅若本論釋

漢三

十三

則與此殊偈云種種顛倒識以離於實念不住彼實智是故說顛倒○三推破雜染以釋非心

所以者何須菩提過去心不可得現在心不可得未來心不可得

無著云過去已滅故未來未有故現在第一義故○十六斷福德例心顛倒疑論云向說心住顛倒皆不可得若如是福德亦是顛倒何名善法○斷之文二○初問福

須菩提於意云何若有人滿三千大千世界七寶以用布施是人以是因緣得福多不如是世尊此人以是因緣得福甚多
以是離相無倒行施因緣成無漏福離於二障既非顛倒故得福多○二及釋順釋須菩提若福德有實如來不說德福德多以福德無故如來說得福德多
偈云佛智慧為本非顛倒功德論云顯示福非顛倒佛智為本故福有者取相也福無者離相也問福性空故福多者前說妄心性空妄亦應多答福以佛智為本順於性空故悟性空福則甚多心識顛倒違於性空故悟性空則心識都盡十七斷無為何有相好疑論云若諸佛以無為得名云何諸佛成就相好而名為佛此約法身佛

故以為疑○斷之文二○初由無身故現身

須菩提於意云何佛可以具足色身見不也世尊如來不應以具足色身見何以故如來說具足色身即非具足色身是名具足色

身

漢三

十四

即隨形好也如鏡中無物方能現物故論云法身畢竟非色身非諸相然相好二種亦非不佛此二不離法身故是故此二亦得言無故說非身亦得言有故說成就○

二由無相故現相

須菩提於意云何如來可以具足諸相見不也世尊如來不應以具足諸相見何以故如來說諸相具足即非具足是名諸相具足即三十二相也一一如前色身中說十八

斷無身何以說法疑論云若如來色身相好不可得見云何言如來說法○斷之文三○初遮錯解

須菩提汝勿謂如來作是念我當有所說法莫作是念

谷中無人能作音聲故○二釋所以

何以故若人言如來有所說法即為謗佛不能解我所說故

世尊達諸法空畢竟無執今言有說是謗佛執法也○三示正見

漢三

十五

須菩提說法者無法可說是名說法

偈云如佛法亦然所說二差別不離於法界說法無自相大雲云若言無說是真說法若言有說不名說法是謗佛故○十九斷無法如何修證疑論云如來不得一法

云何離上上證轉轉得阿耨菩提為斷此
疑示現非證法名為阿耨菩提○斷之文
三○初以無法為正覺

須菩提白佛言世尊得阿耨多羅三藐三菩
提為無所得耶佛言如是如是須菩提我於

阿耨多羅三藐三菩提乃至無有少法可得
是名阿耨多羅三藐三菩提

偈云彼處無少法知菩提無上論云彼菩
提處無有一法可證名為阿耨菩提○二
以平等為正覺

復次須菩提是法平等無有高下是名阿耨
多羅三藐三菩提

偈云法界不增減論云是法平等是故名
無上以更無上上故○三以正助修正覺
以無我無人無衆生無壽者修一切善法則

得阿耨多羅三藐三菩提須菩提所言善法
者如來說即非善法是名善法

無我等是了因即正道也修一切善法是
緣因即助道也即得阿耨菩提是正覺也
所言善法者標指也即非等者論云彼法

無有漏法故名非善法以有無漏法故名
為善法○二十斷所說無記非因疑論云

若修一切善法得阿耨菩提者則所說法
不能得菩提以是無記法故○斷者

須菩提若三千大千世界中所有諸須彌山

漢三

六

王如是等七寶聚有人持用布施若人以此
般若波羅蜜經乃至四句偈等受持讀誦為
他人說於前福德百分不及一百千萬億分
乃至算數譬喻所不能及

偈云雖言無記法而說是彼因是故一法

寶勝無量珍寶論云以離所說法不能得
大菩提故此法能為菩提因又言汝法是
無記而我法是記是故勝捨無量七寶○
二十一斷平等云何度生疑論云若法平
等無高下者云何如來度衆生○斷之文

四○初遮其錯解

須菩提於意云何汝等勿謂如來作是念我
當度衆生須菩提莫作是念

二示其正見

何以故實無有衆生如來度者

偈云平等真法界佛不度衆生以名共彼
陰不離於法界論云衆生假名與五陰共
不離法界○三反釋所以

若有衆生如來度者如來則有我人衆生壽
者

論云若如來有如是心五陰中有衆生可
度者此是取相過無著云如來如芥炎而
知是故若有衆生想則為有我取○四展
轉拂跡

須菩提如來說有我者則非有我而凡夫之
人以為有我須菩提凡夫者如來說則非凡
夫

二十二斷以相比之真佛疑論云雖相成
就不可得見如來而以見相成就比智則
知如來法身○斷之文五○初問以相表

佛

須菩提於意云何可以三十二相觀如來不
二答因苗識根

須菩提言如是如是以三十二相觀如來
大雲云前悟色身今迷法身意謂法身既

流出相身即由此相知佛證得無相法身

○三難凡聖不分

佛言須菩提若以三十二相觀如來者轉輪聖王則是如來

偈云非是色身相可比知如來諸佛唯法

身轉輪王非佛○四悟佛非相見

須菩提白佛言世尊如我解佛所說義不應以三十二相觀如來

五即見聞不及

余時世尊而說偈言若以色見我以音聲求

我是人行邪道不能見如來

魏加後偈云彼如來妙體即法身諸佛法身不可見彼識不能知偈云唯見色聞聲是人不知佛以真如法身非是識境故無著云以彼法真如相故非如言說而知唯

自證知故二十三斷佛果非關福相疑由

前相比法身是失又聞以色見聲求是邪

遂作念云佛果一向無相無為若亦則修

福德之因但成相果相果既非佛果佛果

則不以具相而得故佛果畢竟不關福相

故論云有人起如是心若不依福德得大

菩提如是諸菩薩則失福德及失果報○

斷之文四初遮毀相之念

須菩提汝若作是念如來不以具足相故得

阿耨多羅三藐三菩提須菩提莫作是念如

漢三

大

來不以具足相故得阿耨多羅三藐三菩提

華嚴經云色身非是佛音聲亦復然亦不

離色聲見佛神通力肇云不偏在色聲故

言非非不身相故復言是大雲云若言如

來不以相具斷滅見矣故佛止云莫作是

念○二出毀相之過

須菩提汝若作是念發阿耨多羅三藐三菩提心者說諸法斷滅莫作是念

毀相則墮斷滅斷滅是損滅之過斷見邊見之過○三明明福相不失

漢三

九

何以故發阿耨多羅三藐三菩提心者於法不說斷滅相

無著云於法不說斷滅者謂如所住法而通達不斷一切生死影像法於涅槃自在行利益眾生事此中為遮一向寂靜故顯

示不住涅槃偈云不失功德因及彼勝果報論云雖不依福德得真菩提而不失福德及彼果報以能成就智慧莊嚴功德莊嚴○四明不失所以二○初明得忍故不失

須菩提若菩薩以滿恒河沙等世界七寶布施若復有人知一切法無我得成於忍此菩薩勝前菩薩所得功德

論云有人起如是心諸菩薩得出世智失彼福德及以果報為遮此故偈云得勝忍

不失以得無垢果無我者二種無我也○

二明不受故不失二○初正明

須菩提以諸菩薩不受福德故

論云彼福德得有漏果報故可訶也無著云此顯示不著生死故若住生死即受福

德○二徵釋

須菩提白佛言世尊云何菩薩不受福德須菩提菩薩所作福德不應貪著是故說不受福德

二十四斷化身出現受福疑論云若諸菩

薩不受福德云何諸菩薩福德衆生受用

○斷之文二○初斥錯解

須菩提若有人言如來若來若去若坐若卧
是人不解我所說義

偈云是福德應報爲化諸衆生自然如是

漢三

干

業諸佛現十方○二示正見

何以故如來者無所從來亦無所去故名如
來

偈云去來化身佛如來常不動大雲云衆
生心水若清淨則見佛來來無所從濁則

見雙林示滅則云佛去去無可至肇云解
極會如體無方所緣至物現來無所從感
畢爲隱亦何所去○二十五斷法身化身
一異疑據前不可以化相此知法身法身
無去來坐卧即似真化異據遮斷滅之念

又顯不失福相即似真化一故成疑也此約
微塵世界委釋非一非異義以斷此疑○
文二初約塵界破一異五○初細末方便
破麤色

須菩提若善男子善女人以三千大千世界
碎爲微塵於意云何是微塵衆寧爲多不甚
多世尊

偈云於是法界處非一亦非異論云彼諸
佛如來於真如法界中非一處住亦非異
處住爲示此義故說世界碎爲微塵故偈

漢三

三十一

云世界作微塵此喻示彼義○無著云爲
破名色身故說界塵等於中細末方便及
無所見方便塵甚多者是細末方便○大
雲云即是析塵至於細末以此方便破麤
色矣此言微塵依大乘宗於一搏色假想

分析至極略色爲塵非小乘宗實塵矣○

二不念方便破微塵

何以故若是微塵衆實有者佛則不說是微塵衆所以者何佛說微塵衆則非微塵衆是名微塵衆

論云塵碎爲末故非一處塵衆聚故故非異處如是佛住法界中非一處住非異處住○又若塵衆實有者世間凡夫悉亦自知何須佛說祇爲不知體不成就故佛說矣故無著云世尊說非者以此聚體不成

就故若異此者佛雖不說亦自知是聚○

三不念方便破世界

世尊如來所說三千大千世界則非世界是名世界

本論破世界不實之義可知無著云此破

名身世界者衆生世界○四俱約塵界破和合

何以故若世界實有者則是一合相如來說一合相則非一合相是名一合相論云若實有一世界如來則不說三千界

大雲云若實有一世界冥然是一一和合矣是則不含有多差別今既佛說三千明非冥然一矣故約三千破一界也○無著云爲並說若世界若微塵界故有二種搏取爲一搏取及差別搏取大雲云此明塵

漢三

三

衆及衆生類俱名世界一合相者即是搏取搏取爲一故云和合故此一合有二搏取一者一搏取即是世界和合爲一二差別搏取即是微塵有衆多極微名爲差別非一合者第一義中二界無實故五佛印

無中妄執有

須菩提一合相者則是不可說但凡夫之人貪著其事

論云以彼聚集無物可取虛妄分別故云妄取若有實者即是正見無著云世諦說

搏取第一義不可說彼小兒凡夫如言說

取大雲云執見五蘊取其和合是貪著事迷於事法起煩惱矣○二約止觀破我法

二初除我執二初斥錯解

須菩提若人言佛說我見人見眾生見壽者

見須菩提於意云何是人解我所說義不世

尊是人不解如來所說義

二遣言執

何以故世尊說我見人見眾生見壽者見則非我見人見眾生見壽者見是名我見人見

漢三

三

眾生見壽者見

漢三

論云我見虛妄分別佛說即是不見無著云此顯示如所不分別云何顯示如外道說我如來說為我見故安置人無我又為說有此我見故安置法無我如是觀察菩

薩入相應三昧時不復分別即此觀察為

入方便○二除法執二○初除分別

須菩提發阿耨多羅三藐三菩提心者於一

切法應如是知如是見如是信解不生法相

無著云此顯示何人無分別於何法不分

別何方便不分別○此顯示增上心增上

智故於無分別中知見勝解○於中若智

依止奢摩他故知依止毗鉢舍那故見此

二依止三摩提故勝解以三摩提自在故

解內攀緣影像彼名勝解○云何無分別

此正顯無分別大雲云前之方便是加行
智今不分別是根本智即親證真如離能
所取名不分別○二顯本寂
須菩提所言法相者如來說即非法相是名
法相

無著云此顯示法相中不共義及相應義
如前已說二十六斷化身說法無福疑因
聞真化非一非異意云若就非一化唯虛
假若就非異又唯冥合歸一法身即化身
終無自體若尔即所說法受持演說無福

○斷之文二○初明說法功德

須菩提若有人滿無量阿僧祇世界七寶持
用布施若有善男子善女人發菩薩心者持
於此經乃至四句偈等受持讀誦為人演說
其福勝彼

偈云化身示現福非無無盡福論云雖諸
佛自然化身作業而彼諸佛化身說法有
無量無盡無漏功德○二明說法不染
云何為人演說不取于相如如不動

無著云為說法不染故以有如是大利益
故決定演說如是演說即無所染○云何
演說等者顯示不可言說故若異此者則
為染說以顛倒義故又說時不求信敬等
亦為無染說法○大雲云若能不以生滅
心行說實相法則如彼真如故曰如如又
心如境如故曰如如不動者則無染義○
二十七斷入寂如何說法疑論云若諸佛
如來常為衆生說法云何言如來入涅槃
○斷者

何以故一切有為法如夢幻泡影如露亦如

電應作如是觀

釋此文為三初約兩論釋魏本中九喻魏本云一切有為法如星翳燈幻露泡夢雲雲應作如是觀○於中文二初約本論斷疑偈云非有為非離諸如來涅槃九種有

漢三

五五

為法妙智正觀故論云諸佛得涅槃化身

說法故非有為非離有為何故示現世間而不住有為由妙智正觀有為如九喻虛假故○二兼無著釋相無著云此偈顯示四有為相文四○一自性相此見相二用

識為體生死根本故文三○一星喻見無著云無智暗中有彼光故有智明中無彼光故○二騎喻相論云如目有騎則見毛輪等色觀有為法亦亦以顛倒見故無著云人法我見如騎以取無義故○三燈喻

識燈約膏油相續不絕識依貪愛生死無休○二著所住味相論云幻喻所依住處以器世間種種差別無一體實故無著云味著顛倒境故大雲云幻出城郭誑人識變山河不實故○三隨順過失相自身及

受用是過失觀此無常是名隨順又解云隨順身受即是過失文二○初露喻身論云身亦如是少時住故二泡喻受論云所受用事亦復如是以受想因三法不定故無著云顯示隨順苦體以受如泡故功德施云觀察壽如水泡或始生未成體或纔生或暫停住即歸散滅○四隨順出離相無著云隨順人法無我故得出離文三○初夢喻過去無著云彼過去行以所念處故如夢論云應觀過去所有集造同於夢

境但唯念性故功德施云觀察作者如夢中隨見聞之境以念分別熏習住故雖無作者種種境界分明現前如是衆生無始時來有諸煩惱善不善業熏習而住雖無我是能作者而現無涯生死等事○一電

喻現在論云以刹那不住故功德施云觀察心如電生時即滅三雲喻未來論云以於子時阿黎耶識與一切法爲種子根本無著云波籛惡種子似虛空引心出故如雲○無著云如是知三世行則達無我此顯示隨順出離相大雲云過未無體現又不住則三世空達無我矣○二約諸經顯諸虛假喻之大意佛說一切法空疑云云何現見一切境界故說如幻幻法雖無分明可見又疑云幻法既無人何愛著故說

如陽焰渴鹿謂之水愛著奔趣又疑云渴鹿畢竟不得水貪者如何皆得受用故說如夢夢中所見亦得受用又疑云夢造善惡寤無業報夢打尊長寤無憂懼故說如影如響雖全無體明鏡對色空谷對聲妍

媼高低一一皆應必無雜亂必無參差又疑云苦都無實菩薩何以作利樂事故說如化謂變化者雖知不實而化事○三會通秦譯經本夢幻泡影空理全彰露電二喻無常足顯悟真空則不住諸相觀生滅

漢三

三

則警策修行妙符破相之宗巧示亡情之觀○魏譯九喻秦本略者以星燈有體雲種含生恐難契空心潛滋相想取意之譯妙在茲焉○第三流通分

佛說是經已長老須菩提及諸比丘比丘尼

優婆塞優婆夷一切世間天人阿修羅聞佛所說皆大歡喜信受奉行

尼者此云女也優婆塞此云近事男優婆夷此云近事女親近比丘比丘尼而承事故阿修羅此云非天皆大等者文殊所問

經云有三種義歡喜奉行一說者清淨不為取著利養所染二所說清淨以如實知法體三得果清淨○無著云若聞如是義於大乘無覺我念過於石究竟無因故天親云諸佛希有總持法不可稱量深句義

從尊者聞及廣說迴此功德施羣生大雲云大聖說經妙理斯畢二空圓極四眾奉行肇云同聽齊悟法喜蕩心服既遵式永崇不朽資聖云般若深經三世佛母聞經四句以超惡趣之因一念淨持必獲菩提

之記故人天異類莫不虔受奉行矣

金剛般若經疏論纂要下

漢三

五八